



Rabu, 06 Januari 2021

Ogen: Masmur 90:14-17



Rulih Si Idahiken



Sada keriahen ngeluh eme adi kai si idahken kita ruli. Ruli ertina mereken asil. La sia-sia. Arah enda si idah maka kita selaku anak-anak Tuhan tetap ndahiken dahinta alu mehuli. Ndahiken dahin alu mehuli langa tentu mereken ulih si bagi ukur. Engkai? Kentisik kita nuli kulas kegeluhen bangsa Israel tupung bangsa Israel mulih pembuangan i Babil nari.

Adi si oge Hagai 1:5-11, *Mbue kam ngamburken benih, tapi sitik ngenca iperanindu. Tuhu man nge kam, tapi la besur. Lit anggur man inemenndu, tapi la bias seh puas. Tuhu ruis nge kam, tapi bergehen denga. Kalak upahen ibunikenna upahna i bas perbeliten pultak-pultak. Iarapkenndu mbuah pagendu, tapi sitik ngenca ulihna. Janah kenca ibabandu peranindu e ku rumah, Kusempulken pe. Engkai maka Kulakoken si e? Erkite-kiteken RumahKu e ipediatndu i je runtuh, sedangkan sekalak-sekalak kam sibuk pekena-kena rumahna jine. Em sabapna maka wari la udan, janah la lit kai pe si banci turah. Kelegon Kubahan negeri enda, deleng-deleng, juma-juma, peken anggur, peken saitun, bage pe kerina si turah i taneh, manusia, rubia-rubia ras ulih kelatihenndu."*

Masmur 90 enda pe pertoton gelah ipasu-pasu Dibata kegeluhen bangsa Israel. Si arah pengalamen kegeluhenna maka tupung nggeluh ia i bas dosa sia-sia me kegeluhenna si kentisik enda. Emaka sada pertotonna gelah ajari meligai wari-wari si bentasina (ay.12). Ruli i jenda eme adi kita nggeluh i bas hubungan si payo ras Dibata. Adi la ras Dibata maka ulih e pe sia-sia. Terjeng lit idat saja tapi labo mereken kemalemn ate. Tapi adi nggeluh ras Dibata, kai sidahiken kita mbaba ulih si mere kemalemn ate, sialoken alu dem pengataken bujur. Asakai pe ulihna eme si payona rikutken pasu-pasuNa. Janah banci si nanami alu dem keriahen radu ras anak jabuta sabab ijeme ingan ngenanami ulih dahin si ipasu-pasu Dibata.

Ulih la terjeng bilanggenna tapi kualitasna 🐦